

رباعیات

ولکن

مش صلاح چاہیں

الكاتب: أحمد عبد العزيز.  
تدقيق لغوي: حنان حسن مظلوم.  
الإخراج الفني: ضياء فريد.  
تصميم غلاف: محمد محسن.  
رقم الإيداع: 2020/19035  
الترقيم الدولي: 5-56-6689-977-978



9 شارع مسجد المغفرة المتفرع من شارع العشرين  
بجوار مدارس حسام الدين الخاصة فيصل الجيزة.

موبايل 01126026691 01061813345

01009823984

ديوان بالعامية المصرية

رباعيات

ولكن

مش صلاح جاهين

أحمد عبد العزيز



## إهداء

إلى أخي الذي لم تلده أمي..  
دفعتي وزميلي وصديقي..  
الزجال والشاعر الجميل..  
الذي لم يمهل القدر نشر ديوانه..  
ربما سمعنا كلماته في حياةٍ أخرى..  
الشهيد/ أحمد صابر منسي.



## مقدمة

مثل الكثيرين من أبناء هذا الجيل -الوسطاني حاليًا-  
جيل سبعينات القرن العشرين، الجيل الذي اختطف في  
حياته بضع سنوات من عمر شعراء، وكتاب، وملحني، وفناني  
الجيل الذهبي في مصر، الجيل الذي تربى في طفولته على صوت  
«أم كلثوم»، وعاشَ في صباه وشبابه صوت «فيروز» و«الرحبانية»،  
وتذوق ألحان «عبد الوهاب»، و«بليغ حمدي»..  
وقرأ كتابات متنوعة، بداية من «يوسف السباعي» و«أنيس  
منصور»، وصولاً إلى مدرسة «مصطفى محمود» و«راجي عنایت»..  
وضحك من سخرية «محمود السعدني»، و«أحمد رجب»، ونكت  
«مصطفى حسين».. وتربى على صوت «فؤاد المهندس» المميّز،  
وهو يقول:

«كلمتييييين وبس».

ثقافة جيل تكونت من خليط من كل هذه الإبداعات.

ولكن سرعان ما تغير حالنا مع الانفتاح، وما تركه من أثر على كل شيء في حياتنا، من «الزحمة، والسح الدح أمبو، ومفهوم اللي تكسبه العبه».

وتبدلت أحوالنا، مثلما تبدل حال التلفزيون الأبيض والأسود، وقناته الأولى والثانية، وأصبح شاشة، رفيعة، معلقة على الحائط وفضائيات لا تصمت ليل نهار، وبعد السماعه، والقرص، والرد المعتاد على المتصل بعبارة «مش موجود والله، لما يرجع حقوله يكلمك».. إلى لعنة هذا «السمارت فون» الشيطاني، القادر على إيجادك في كل مكان وزمان، وتطبيقاته الشريرة، التي سرقت أوقاتنا ومشاعرنا وثقافتنا وتوجهاتنا، ولا أدري كيف ومتى مرت كل هذه السنين، وبعدها كنا ننتظر قدوم العيد لنحصل على «العيدية»، فجأة استيقظنا يوماً لنجد من ينادينا بألفاظ مثل «بابا، وماما، وخالو، وعمو»، وقريباً سنجد من ينادينا بلفظ «جدو»، حتى أولادنا.. تغيرت حياتهم، وأصبحوا يلعبون بمنتهى الأناقة والشياكة، وأصبحت ملابسهم نظيفة دائماً، ولم يعد أحدهم يعود إلى المنزل وملابسه ممزقة، أو بحذائه خرق من شوط «الكورة الشراب»!!

حتى كرة القدم، تبدل حالها، وأصبح اسمها «فيفا ٢٠٢٠»، وبذراعات وشاشة.. حاجة كده ديجيتال والعياذ بالله!!

ورغم كل التغييرات التي حدثت في حياتنا، بما فيها التغيير في الذوق العام، والثقافة العامة، كان هناك دائماً شعاع أمل.. لا يزال موجوداً، ونوعاً من الثقافة والفن الحقيقي يتحسس طريقه

بنعومة، في وسط كل هذا الضجيج والصداع، في قصيدة من «سيد حجاب» أو «الأبنودي»، في نغمة من «عمر خيرت» أو «عمار الشريعي»، كأنما صوتًا حفيظًا يحاول التعبير عن نفسه، يصارع التغيير في وسط كل الأصوات المرتفعة والنشاز. وهذا الصوت دائمًا ما كان له دراويشه ومريدينه، له مَنْ يبحث ويفتش عنه في كل مكان، وبكل طريقة.

وكنت أنا على الدوام أحد هؤلاء الدراويش..

أبحث دائمًا عن ذهب مدفون، في كلمات أغنية، أو في معنى مستتر، صادم للمشاعر، أو في لحن جميل يعزف على أوتار الذكريات..

ومن بين كل مناجم الذهب، كان هناك نوع غريب.. لامع.. منفرد بذاته.. له شخصية واضحة جدًا، تعرفها من أول كلمة تسمعها منه، وانجذبتُ جدًا لعالمه، وغصت فيه وبسرعة «لخبط كياني»..

كان اسم هذا الرجل هو.. (صلاح چاهين).

بسيط لدرجة تفقدك أعصابك، عميق لدرجة الجنون، تسمع كلماته تشعر أنها كانت «على طرف لسانك»..

وتشعر بأنه طفل صغير يلعب بورقة وقلم، يرسم عليها وردة وعلم، أو بأنه صبي مفعم بالحيوية، يستقبل الحياة بابتسامة أمل وتفاؤل.

وتشعر أحياناً أنه رجل عجوز، عمره ألف عام من الأحزان  
المُبكية، تسمع في طيات كلماته صدى «ضحكة ودلع سعاد حسني،  
وتناكة الواد الثقيل، وصوت الصفيحة اللي في بق الأراجوز».

لكن أكثر ما وقفت عنده، وهز مشاعري هو (لعبة الأربع سطور)،  
بمنتهى البساطة والرشاقة، استطاع أن يخلق حكاية وحدوتة في أربعة  
أسطر، حبكة درامية، وتتصاعد أحداث، وأزمة، وبداية قوية، ونهاية  
صادمة، في أربعة أسطر..

صراع، وسخرية، ونكتة، وقفشة، وفلسفة، تبدأ وتتصاعد حتى  
ترفعك للسماء، وتعود فجأة لتلقي بك على الأرض بعنف شديد.  
من فرط سهولة نطقها، تظن أنك كنت على وشك أن تتفوه  
بها، لكن ما أن تشرع في كتابتها، تهرب منك الكلمات والأوزان  
والقوافي.

نوع منهك جداً من الكتابة الشعرية..  
وفخ عظيم للكاتب، لأن من يقرأها يستشعر فيها السهولة، ولا  
يرحمك إن أخطأت فيها..

لكنني أحببتها، وتحديتها أن تطاوعني..  
ربما تظني أحاول تقليده.. ولا أستطيع أن أكذبك.. لأنني لا  
أدري حقاً إن كنت أفعل ذلك أو لا!

وبالتأكيد ستقارن بيني وبينه، وبالطبع سأخسر في المقارنة،  
ولكن كم سيسعدني ذلك، فمجرد وضع اسمي بجوار اسم (صلاح  
چاهين) في جملة، هو في الواقع إطراء لم أحلم به يوماً.

وبكل تأكيد أنني ومن غير قصد، أفتح على نفسي أبواباً لست أهلاً لها من النقد والتحليل والمقارنة..

«واللي عاوزين تقارنوني بيه ده غول الأدب والشعر».

لكن الحقيقة، بمنتهى الصدق والصراحة، هو إني دخلت عالمه وعشت داخله، وفي الكثير من الأوقات أحسست أن «عفريته بيلبسني» ويمسك القلم ويكتب، أحياناً كنت أحس أو أتمنى أن أكمل بعض كلمات انتهى عمره ولم يكملها..

وكنت دائماً ما أكتب كلما خطر على بالي فكرة جديدة.. وكان دوماً المكان الطبيعي لكل هذه الكتابات هو «درج المكتب».

ويوماً ما راودني خاطر.. ماذا لو أشركته معي، وسألته:

- إيه رأيك يا عم صلاح تيجي ننشر الكلام الفارغ دا؟  
وشعرت أنه لو كان موجوداً أمامي لأجابني بفلسفته المعتادة،  
وخفة ظله:

- تخيبه ولا تنشره، هي كام سنة إنت وهو حتتنسوا،  
يعني لو عجب الناس، وقالوا عليك بتفهم، ولا قالوا  
عليه كلام بايخ، وطلعت حمار، في الحاليتين حينسوا،  
يبقى واجع دماغك ليه؟! انشريا راجل، أدينا بنجرب.  
كنت بالتأكيد أتخيل الحوار، أو الأصح إني أكون «بستهيل»،  
لكن قررت أجرب وأتحفكم بهذا الكلام الفارغ.

أنا لا أدعي الموهبة على الإطلاق، والمعتاد أنني كنت دائماً ما أكتب خواطر أو رؤى مختلفة عن الحياة، في صورة سخرية أو تأملات..

كنت أحاول أن أصنفها، ولم أكن حتى أعلم تصنيفها الأدبي، لكنني حاولت أن أتشجع، وأتجرأ، وأواجه نفسي، وأخوض هذه التجربة، لسبب واحد..

من الممكن لكلمة واحدة أن يكون لها أثر جيد على متلقي، وبما أن الكلمة هي أمانة كبيرة، فقد تترك كلماتي أثراً نافعاً لإنسان.. أو هكذا أتمنى، يوماً ما قد يصبح ذلك سبباً من أجله وجدت على هذه الأرض، وفي هذه الحياة، وقد يضيف هذا معنى لحياتي..  
«يعني بالبلدي كده ما أبقاش جيت ومشيت من غير ما أضيف حاجة».  
وطالما أن القارئ هو اللي بيدفع تمن الكتاب،  
يبقى أنا مش خسران حاجة..

---

لم يكن صلاح جاهين أول من نظم الرباعيات..  
لكنه بالتأكيد من أضاف لها روحًا..  
من منحها الرشاقة والحيوية وخفة الظل.  
لذلك ارتبطتُ به كأنها ابنته المدللة..  
ولكنها صمتت منذ رحيله.  
وكل ما حاولتُ أنا فعله..  
أن أعيد ولادة الطفلة الشقية من جديد..  
في رباعيات ولكن.. مش صلاح جاهين.



قریت کلامک یا عم صلاح لقیته کلام فی الجون..  
نکته و غنوة ما تعرف عبقری دا ولا دا کان مجنون!  
عجی علیک یا فیلسوف الغلابة فی أربع سطور عجی!  
لیه تصعبها کده دا أنا بس غرضی یكونلی کلام موزون.

يا ليلة سماها صافية.. والقمر ساطع..  
يا صمت النقاء والسلام والروائع..  
قالولي ليك الليلا دي أمنية.. قلت أنا..  
تكون حياتنا زيك كده من غير مواجع.

مرة دخلت في نقاش وجودي مع حنة خشب..  
جواها فحم إسود.. وع الورق بيها اتكتب..  
حنة قلم رصاص ولا فاكر نفسك مين!  
قالي دا إنت حتصير تراب، وأنا اللي حاتأقل بالذهب.

لمع القمر في ليلة من ليالي البدر..  
ونسج للعشاق حكاوي اللقا والهجر..  
طالت سهرتي، لكنه سابني وراح..  
حتى إنت يا مسكين نهايتك طلوع الفجر!

دي نصيحة مني وإنت لسه شباب تتفق معايا أو تختلف..  
بالصبر والعمل وبالإصرار.. توصل لغايتك، وتبطل تستلف..  
رد عليا بنصاحة وقالي.. دي ضربة حظ..  
قلته يا ابني.. دا حتى في الطاولة الزهر لازم يتحذف.

فيه حاجز خفي وغامض بين الحياة والممات..  
له ناحية بنعيشها.. وفي كل يوم تتولد حكايات..  
حاولت أكشف الناحية الثانية لقيتها مستورة..  
لكني سرقت م اللي راحولها يا دوب ذكريات.

إياك تخاف من غروب الشمس يا صاحب الأمل..  
دا ياما شروق بعد الظلام، وبعد يأس وملل..  
تروح فين إنت يا مسكين في دوران النجوم..  
ريح بالك من تصريف الحياة، ما عليك إلا العمل.

كان أول درس ليك في تاريخ الخير والشر..  
يوم ما اتخلقت وكان إبليس طاووس و اتغَرَّ..  
ملعون اللي ما رضي بحاله.. دا كان الدرس..  
مكنش القصد تتعلم.. إن كتمك للغرور مُر.

لبست نضارة القراية عشان توضحلي الكلام في السطور..  
وفتحت كتاب الحياة على أول صفحة وولّعت النور..  
بسرعة خلصت أول فصل.. لقيت شعري شاب..  
إخص عليك يا كتاب.. صفحات دي ولا سنين وشهور.

ضعيف ومستضعف.. ومخلوق من طين صلصال..  
كبر واستكبر.. وظلم وسرق واحتال..  
مرت سنين في غمضة عين.. صبح تراب..  
وفي يوم المطر.. خرجت تلعب بالطين العيال!

في السيرك راح تلاقي من كل أصناف الوحوش..  
وخلق تننطط ع الحبال وأراجوز عبيط مهبوش..  
ساعتين والعرض انتهى.. خرجت م الخيمة..  
لقيت عرض تاني.. بس الفنانين لابسين وشوش!

نكتة قديمة بايخة، وناس بتضحك معرفش ليه؟  
دمها تقيل ويلطش، ولا حتى تنفع تكون إفيه!  
شافوني بستغرب.. قالولي اضحك يا مغفل..  
إنت متعرفش إن اللي قالها ده يبقى سعادة البيه!!

صول وجول وناطح في الزمن واصرخ صرخة مدوية..  
عافر، وخريش بالضوافر والحوافر، وقود معركة حربية..  
إيه جراك لما وقعت من على ظهر الحصان.. بكيت!  
محدث قالك إن الحياة دي ظالمة وعنيدة ومؤذية؟!

لوحتحسب سنين عمرك أنصحك ماتحسبهاش..  
دا ياما أوقات حلوة عشتها، وأوقات مابتعشهاش..  
ولوحتحسبها تسوى كام.. برضه حتلاقي..  
فيها أوقات تغلى عليك.. وأوقات تاني ببلاش.

يا نص كوباية فاضية ولا مليانة على حسب الشوف..  
يا ترى اللي فيكي ده أمان وأمل، ولا يأس وخوف؟  
احتاروا فيكي في الأمثال والعبر..  
مع إنه مش ذنبك.. دا ذنب العين اللي بتشوف!

يا مخلوق بطين صلصال.. على أي دين كنت أوملة..  
إياك تغرك نفسك، وعزوتك، والأهل، والشلة..  
راح تعود تاني زي ما كنت.. بس خد بالك..  
احتمال تعود للوجود في هيئة زير.. وجايز تكون قلة!

يا كلب يا ساكن برد الشوارع، وعمرك ما شفت دفا..  
يا اللي سارج ليل نهار تاكل م الزبالة.. بالهنا والشفاء..  
يجري وراك العيال يحدفوك بالطوب في طريق المدرسة..  
يدق الجرس.. وعالفصول يتعلموا صفة الكلب الوفا!

كان مطلب جماعي م العيال نجيب قطة قطفوطة..  
قلت دي مسئولية، وأكل، وشرب، ورعاية مظبوطة..  
قالولي نועدك.. صدقت، وجبنا بسبس..  
أَكَلْتُ وَشَرِبْتُ، ولما جه وقت الخلا، مَسَحْتُ أَنَا بفوطة!

لوفاضي شوية تعالى أحكيك حكاية ليها العجب..  
فيها م العبرة والأحزان، وفيها م الضحك للركب..  
أديني حكيتهها خلاص، ليه يا ترى عينك دمعت؟  
دا يظهر كده.. إن البكا ليه ولا مليون سبب!

عالشط قاعد أعدّ الموجة ورا الموجة، و أتأمل في أحوالها..  
تنشأ عفيّة، وبسرعة عالصخر تتكسرو وتروح لحالها..  
ولا موجة اتعلمت م الدرس، ولا شافت مصيرها..  
فكرت أنا في الخلق لقيته زي الموج لا فرق جاهها ولا مالها!

حكايتك راح تتكتب في حياتك.. خليها حاجة تشرّف..  
دي حتعيش سنين بعدك، وحتيجي ناس وتحرّف..  
عاوزها تصمد، وما تقبل التحريف؟  
خلي أصلها نضيف، خليك محترم وبلاش تحرّف.

يا ترى كام ألف مليون عاشوا من عصر حجري وحتى معاصر؟  
ولكل واحد حكاية.. احكي لي واحدة لو كنت شاطر..  
دا هي كام سنة في عمر الكون وراح تتنسي..  
مش عاوز تصدق.. طب ما تيجي معايا نزور المقابر.

ولو ساد النفاق والكذب، انطق بالحق، وإياك تضطرب..  
دي السلعة الرخيصة هي اللي دايمًا في السوق تنطلب..  
ضروري راح يبجي يوم والحقايق تنكشف..  
وتقع في الشباك كل الطيور، وينجى اللي م السرب هرب.

دي غلطة بسيطة بتبصولي ليه من فوق لتحت يا بشر؟  
خلاص بقيتوا ملايكة.. وأنا بقيت الكذاب الأشر؟!  
ما تبص في مرايتك إنت وهو.. ولا أقولك..  
لما تبقى من غير خطيئة.. ابقى احدفني بحجر.

يا ما كان زمان حواديت من زمان.. وكان يا ما كان..  
لكل حدوتة زمان ومكان، واتحكت في مكان وزمان..  
قالولي قول العبرة، وبلاش لخبطة.. قلت اصبر شوية..  
ده بكرة بيعي زمان، وتصبح حكايتك زمان يا ما كان.

فيه شيء غريب في علاقات الأخوة والصدّاقة والزمالة..  
قالولي دا عيب الزمان ده.. ما رضيت أسمع قوالة..  
قلت.. دا يا ما أزمان ما عابها غير اللي عاشها..  
وزي ما فيه قصص تشرّف، فيه قصص تترمي في الزبالة.

حكيك حكاية بس اوعى لما أخلصها تقوم تنفض..  
كان مرة واحد ظن إنه ما حيروح، وراح ولا قدريعترض..  
خلصت الحكاية.. ولا نقول كمان؟  
دا لوبالجتة.. ما كان فيه ديناصور انقرض!!

عصفور كناريا عمّال يزفزق في الصباح ع الشجر..  
مع نسمة باردة، وريحة فل الجنان بتحضن ريحة المطر..  
راح تلاقي من يفتح الشباك للجمال..  
وتلاقي اللي يقول الدنيا برد.. اقلوا الشباك يا بقر.

في الفلسفة والمنطق كنت أنا أشطرا الشطار..  
قريت في الأدب، وفي التاريخ، وقريت كثير أشعار..  
دعوني في ندوة لجل ما أقول وأعيد..  
قلت كل آرائي ومشيت.. قالوا شفت الحمار!

لولا برق ورعد ومطر.. ما كان الزرع شب ونما..  
وبالشقا والتعب توصل، وبالوقوع في الحفر ربما..  
دوركده في الحياة، و تأمل في ناسها..  
تلاقي اللي صعد للقمة.. تسلق مش هبط م السما.

يا صفحة، بيضا، بريئة، وطيبة.. كما العذراء..  
يهتك بياضك حبر القلم بحروف من باء وتاء..  
مرة انكتب عليكي كلام ملعون، حرقوكي..  
وجعلوكي مقدسة.. لما كتبوا عليكي دعاء.

مش بقوة عضلاتك.. ولا بالجعير لما تتكلم..  
ولا هي نصيحة وفهولة.. دا إنت لازم تتعلم..  
قبلك كتير كان قوي.. ونسي فعل الزمن..  
لكن اللي انتصر، هو اللي ما رضي يستسلم.

في محل العصير، طلبت واحد كوكتيل فخفخينا..  
في عز الحر، وكان ساقع وممتع ابن اللدينا..  
لسه حتفلسف، و أقول زي البشر أشكال وألوان..  
صاحب المحل قالي اشرب وإنت ساكت وهويينا.

رحت لساحر عظيم طالب أكون ملك و ابن ذوات..  
قالي بسيطة، وجلا جلا، لقيتني في قصر، وخدم، وأغاوات..  
يومين والشعب هتف ضدي.. خلعوني وحاكموني..  
لقيتني بتعدِم، قلت فين الساحر؟ قالولي مات.

إيه أئمن الأشياء.. جاه، ولا مال، ولا عُقد وحلق؟  
وإيه غاية الحياة، اللي من أجلها الإنسان اتخلق؟  
مش عاوز إجابة.. أنا بس عاوزك تنتبه..  
وانت بتقرا كلامي في ثانيتين.. عمرك اتسرق.

يا عقل.. يا محتار.. ما بين شك و يقين و ظنون..  
من ألف عام و إنت بتبحث عن خالق هذا الكون..  
نسيت تفكر.. مين ألهمك هذا السؤال؟  
وليه ألهمك.. ما كان يقدر يخلقك مجنون!

فتحت تليفوني على موقع تواصل اجتماعي شهير..  
ونشرت حكمة عميقة عن واحد من المشاهير..  
شافوها صحابي، وانها لوا بالإعجاب..  
قلت أنا لو تعرفوا تفاهتي! أما صحيح شوية حمير!

سألت عن الفيلسوف، قالولي قاعد هناك فوق الجبل..  
قلت أنا لازم أروحله حتى لوالسكة طويلة لا تحتمل..  
جهزت حالي لترحالي.. لكن رجعت وقلت..  
يعني أسيب شغلي أنا، وأروح لواحد لا شغلانة ولا عمل!

عائشين ومتعائشين مع بعضهم هما الاتنين سوا..  
نفس الشقا في الحياة.. نفس الصداع.. نفس الدوا..  
تطالب المرأة بالمساواة.. معلوم حقها..  
لكن تشوف الفارتجري ع الراجل، وتركب هي الهوا!

إياك تفتكر إن الحياة راح تعطيك لو خدتها بهزار..  
دا لازم تقع وتقوم، عشان تقع وتقوم تكمل المشوار..  
كما عود درة أخضر، صبح يابس، هزيل، واتطحن..  
وصار رغيف.. اشتهيت ريحته لما استوى في النار.

في محاضرة عظيمة عن المجتمع والسلام الإنساني..  
قلت لازم نسامح بعضنا، ده الكره ده عمل شيطاني..  
لمحت في الحضور خصي.. ابتسمت برضا..  
بس بعد ما لعبتله حواجبي، وطلعتله لساني!

في وسط مقلب زبالة، ساعات تلاقي نفسك ضيف..  
لا بتعرف تصقف، ولا تطبل، ولا دمك خفيف..  
فجأة تلاقي واحد بيقول إخص..  
إيه اللي جاب دا هنا.. دا شكله نضيف!

يا لى كلامك كله فى التقوى، والعلم والإيمان..  
ورسالة محبة للأصحاب والأهل والجيران..  
ليه لما صادفت واحد غريب يعرفك ضحك؟  
طب طب على كتفى، وقالي باين عليك غلبان.

قلب أسد ما يخاف ولا فتوة الجمالية..  
وجبان مرتعش يترعب من طشة التقلية..  
الاثنين بعد السنين.. نفس التراب أصبحوا..  
مش بقولك تبقى متهور، بس كمان متبقاش هفية.

قدرت أفرح من جديد، بعد ما جرحي طاب واندمل..  
دا لولا الجراح مع الأفراح ما كان معنى الحياة اكتمل..  
سألت م الفرح ولا الجرح الإنسان اتخلق؟  
قالولي دا جرح، وفرح، وتراب، وروح تحيا بالأمل.

ما بين سؤال وإجابة ليه يا عقل متحير؟  
مُسِير أنا في الحياة دي، ولا مُدرك ومتخَيَّر؟  
وليه خايف من سؤالك، وخايف تتسأل؟  
إذا كنت تقدر تشطب ع الكلام دا، وتقدر تغير.

م البشر راح تلاقى المتلونين زي أبطال الرواية..  
إياك تفكر مالهمش مبدأ دا الوسيلة بررتها الغاية..  
ليه تندهش، وليه بتستغرب؟  
دا حتى في عالم الحيوان فيه سحلية حربية!

في دوامة الحياة زحام وضجيج، بحر من غير بر..  
فيه الخلق هايمة تصارع بعضها ما بين الخير والشر..  
هربت أنا للطبيعة البكر وسط الطيور والشجر..  
جاني طير مُغرد، حكيتله عن حالي، لقيته سابني وفَرَّ.

في الطريق ياما حتلاقي مطبات وحفروركام..  
عمرك ما توصل غير لما تتكعبل وتنجرح وتتحمل آلام..  
قالي بس أنا سمعت عن طريق مفروش بالورد..  
قلته معلوم.. دا في رواية اسمها مدينة الأحلام.

يوم بعد يوم، أفكر وأتأمل، والحقايق تنكشف..  
وأغير وأعدل في آرائي، وأديني أهو باعترف..  
وإذا كنت أنا شايف إني ماليش لازمة..  
ليه بتجعلني قديس وكافر، لما كلامي بيختلف!

علامة استفهام سابحة في الفضاء من ملايين السنين..  
صورها علما الفلك من زاوية تسعين ومية وثمانين..  
من بعض الزوايا صبحت تعجب، وعجبي..  
ع اللي حاولوا يجاوبوا ع السؤال، صبح سؤالين!

في ليلة مظلمة، وصوت الريح كأنه همسات من الأشباح..  
سرحت في أفكار مرعبة عن الأجساد وعالم الأرواح..  
سمعت صوت جو ايا بيحاول يطمني.. قلت مين؟  
قالتلي أنا روحك.. كفاية سهر، خلي الجسد يرتاح.

في صالون أدبي قعدت أشرب قهوة وسجارة..  
في ضوء خافت، ومزيكا هادية، ناي وقيثارة..  
بصيت في اللي قاعدين حواليا، عاوز أتطمئن..  
أنا كده خلاص بقيت مثقف، ولا ناقصني نضارة؟!

في وسط أوبئة تصيب الإنسان كما الحيوان والنبات..  
وأعاصير، وسيول، وزلازل، ومجاعة، وشتات..  
يخاف ابن آدم على كل عزيز.. ويقلق..  
ويطمئن باله م الخوف.. على كل اللي مات.

ذاكريا تلميذ، واجتهد، و اقرا الكتاب لأخر صفحة..  
اتعلم م الدرس بعد الدرس، وحاسب من الغفلة..  
دا بكرة بييجي وقت الامتحان الصعب..  
صحيح نفس الامتحان.. بس كل واحد أسئلته مختلفة.

يا صاحب المقام والكرامات، يا أبو خطوة ظاهرة ومخفية..  
ميراثك يا ترى كان علم، ولا دراويش تتمايل في أغنية؟  
قريت كلامك، وعيته، وانتفعت بيه..  
لكن يوم ما عملتلك مولد.. رقصت على قبرك غازية!

ليل إسود، حزين، وسط المطر والبرد..  
ونهار مشرق بالأمل، ومعاه أنا قلبي اتشد..  
سألت البحر ليه كده؟ قالي حالي من حالك..  
محتار أنا زيك.. ما بين جزرومد.

غريق ومتعلق بقشاية، هشة، ضعيفة، متفتتة..  
يقب ويغطس، يصارع الغرق، لكن جهوده متشتتة..  
جريت أنقذه، منعوني، قالولي شكلك جديد هنا..  
دي بركة ضحلة.. ودا كل يوم يعمل أي حاجه مُلفتة!

سألت موج البحر المتلاطم تلال وجبال..  
إيه غاية رحلتي.. ولفين يا بحر وجهة الترحال؟  
وإزاي أنشئ أنا مرسى على شطك؟  
قالي بس اترك أثرنا فع، و أنا حسميك رحال.

وتدور الحياة، وأنت ما تعرف صادقة ولا كدابة!  
تشعر بأنك ملكتها تصدق، تخدعك، ترجع تقول غابة..  
وتصير تراب عطشان.. يرويكَ المطر تفرح..  
تقع عليك م السما نقطة.. تشكيلك غدر السحابة.

في البداية، كان في الجنة، وخرج من أجل تفاحة..  
صحيح أخطأ وتاب.. لكنه فقد الأمان والراحة..  
والآية أهي اتقلبت، وبقت الجنة النهاية..  
أظنك فهمت الدرس.. دا مش محتاج نصيحة.

لو كنت حتعيش في الماضي، راح تصبح عدم..  
دا بكرة يوم جديد بالأمل يتولد.. مش بالندم..  
افتح خزائن ذكرياتك، واكتبها في ورق..  
بس حاسب وإنت بتكتب تمسك قلم يطلع ألم.

جاهل، وفاشل، ومحبط، وكلامه كله سلمي..  
سألته إيه شغلتك؟ قال محدش مقدر مواهبي..  
عصرت دماغي، ولقيتله حل.. طلعتي فيه مشكلة..  
لقيته مبسوط كده.. قلت طب ليه أنا بوجع ف قلبي؟!

ممکن تشرب لاتيه و إنت قاعد على فوتيه وردى..  
فى تكييف ومزيكا، وجرسون حليوة لابس أفندى..  
حلوا الكافيه الخواجاتي.. بس برضه القهوة ليها طقوس..  
كرسي خرزان، وطرقعة القطاش، ويأسحلب، والحساب عندي.

كان كرسي مُذهب قطيفة، وفي أوضة الصالون..  
مرت سنين و اتدغدغ، وعلى جنب أهو مركون..  
زمان ده كان فخر المجالس..  
صبح روبابيكيا.. وأهوزي غيره في الرمال مدفون!

صيف، شتا، ربيع وخريف، بنعيش في تغيير الطقوس..  
مسلم.. مسيحي يعبدوا ربهم، لكن باختلاف الطقوس..  
ما هو ده طبع الحياة.. اختلاف وتنوع..  
ده في مصر بيسموها قطة، وف تونس اسمها قطوس.

من كتر عشقي للبحور وللأمواج على الشيطان..  
حلمت إني بقيت سمكة وسابحة في الخلجان..  
لكني رغم الجمال والرضا، طمعت في شيء بيتلألأ..  
أتاربه طعم صنارة، وأتاري الغدر من طبع الإنسان.

قلته طب ليه اللف والدوران، والحقيقة متقدرة؟  
دا الصدق منجي، والصراحة في الكلام متعطرة..  
ما تخلي طريقك بين نقطتين.. خط مستقيم..  
قالي كان بودي.. لكني للأسف نسيت المسطرة.

ساد السلام والأمان، ومعادش فيه إنسان بيئنّ..  
وعم العدل والمساواة، وانتهى زمن الجوع والمن..  
وعلقوا للظالمين في رقابهم أجراس تجلجل..  
لكن يا خسارة دا طلع صوت المنبه هو اللي بيرن.

ممکن تموت بالسّم من تعبَان، ولا من عقرب..  
وممكن تموت في خناقة، وإنت بتناطح وبت عقرب..  
وممكن تعيش في سلام، وتموت بفعل الزمن..  
وساعتها يبقى الجاني عليك.. هو دوران عقرب!

قالي إنت ماعرفتش إن حسن اشترى فيلا جديدة؟  
وحسين طلق مراته، وحسين اتجوز تفيدة؟  
قلته إيه دخلي أنا.. ما تسيب الناس في حالها..  
قالي بس اسمع بس، دا لسه الحكاوي عديدة.

طول ما إنت عايش في الدنيا ما تجيبش سيرة الموت..  
عود لسانك ع الفرحة والسعادة والرقص بالنبوت..  
دا عقلك يسمع ويطيع اللي بتقوله.. قالي كلامك صح..  
أنا بموت في السعادة، وبحب الفرحة موت!

جاي يقولي مبروك يا سيدي ع العربية الجديدة..  
يظهر العيشة مرتاحة.. وأنا اللي قاعد ع الحديدية..  
قلته تعال أدليك م اللي عندي، بس بشرط..  
تاخذ شوية ابتلاءات ومواجه، ويا الحاجة السعيدة.

كرا كيب كتير في حياتي خردة ومركونة..  
إحباط، ويأس، وذكريات حزينة ملعونة..  
قررت أرميها و أتغير، لكن رجعت وقلت..  
جايز تنفع.. خليها في ركن ف البلكونة.

جوايا دائماً فيه صراعات غريبة ومخيفة..  
شيطان وملاك؟ ولا نفس فاجرة وعفيفة؟  
احترت، لكن عقلي صرخ فيا فوقني..  
قالي دا إنت الحاكم بأمرى.. وأنا الخليفة.

دول تنتصر، وبلاد تنهزم، ولا فيهم أمة سادت..  
لولا أحلام قيصر وهتلر.. ما كانت النارقادت..  
تكتب كتب التاريخ سيرة الملوك ملحمة..  
وتنسى آلاف الجنود اللي في المعركة اتبادت.

فيه ماضي في حياتك زي الخنجر المسموم..  
يرشق في قلبك يقتلك.. أو تقتل بيه الهموم..  
إن كنت وقعت قوم.. وم الصفر ابتي..  
دا مفيش برج بيتبني، إلا بعد ما يتبني البدروم.

قلته محتاج موقف صريح مش كله عادي..  
يا أبيض يا إسود.. أنا بكره اللون الرمادي..  
قالي طب سيبي شوية.. قلت حاضر..  
عدى يوم والتاني، لقيت موقفه هو التفادي.

جريح، أرمن، طلاينة، وتراكوة، وغجّر..  
يا ما عدى عليكي من أصناف البشر..  
ييجي الخواجة ولسانه يتعوج.. يا خبيبي..  
وانتي اللي لغوتك منقوشة ع الحجر!

نجمة في السما لمعت و اتلألأت..  
على ضي القمر اتشجعت و اتجرات..  
قالته راح تبقى هلال.. و أنا زي ما أنا..  
لكن في عز فرحتها الشمس شقشقت.

جاي يطلب وظيفة عشان حالته كده مش تمام..  
والبيت يلزمه مصروف، ومدارس، وكراريس، و أقلام..  
قلته اتفضل وظيفة محترمة.. بس أشوف مجهودك..  
قالي مفهمتش طلبي.. أنا جاي أشتغل مدير عام!

خد بالك وإنت بتأخذ قرار مهم في حياتك..  
فكر في مستقبلك، وادرس وراجع قراراتك..  
ده اللي بتعيشه النهاردة، من كام سنة كان قرار..  
وبكرة بإيدك تفتخر، أو تندم على اختياراتك.

مسكت ورقة وقلم، وقعدت أدور على القافية..  
كتبت.. في وسط موج البحر المركبة طافية..  
قريت كلامي.. لقيته كلام فارغ..  
رمىته وقلت.. حتعملي فيها شاعر بالعافية!

ابحث عن السعادة وقت ما تكون مهموم..  
دا الهم زي البحر، تغرق فيه لو معرفتش تعوم..  
وعند الشط حتلاقي الفرج..  
ما هو مفيش مطربينزل م السما من غير غيوم!

دخلت في منافسات عديدة ومقارنات..  
بيني وبين ناس كثير من أصحاب المهارات..  
مفيش مقارنة غير وخسرت، لكني كسبت..  
يوم ما قارنت بيني وبين نفسي من زمن فات.

قلته اتكلم بالهداوة، أنا مبحبش طريقة القفش..  
دا النقاش والاختلاف في الرأي حاجة متزعلش..  
بصّلي باستغراب شديد، وقالى..  
طبعك غريب جداً.. دا حتى الشتيمة مبتلرزقش!

ليه خايف م اللي جاي، وهو لسه في علم الغيب؟  
دا النهاردة إمبراح كان بكرة، ولا فيه شيء غريب؟  
ده مجرد إحساسك بالخوف، معناه إنك حي..  
ولما حيزول خوفك حتبقى مت، ولا نفعك طبيب.

دنيا طاحونة.. والدريس مشاعر وأحاسيس..  
وشوش بتضحك، وشوش كتير متاعيس..  
أبطالها كومبارس في مسرحية..  
وخشبة المسرح فيها بدل الكالوس كواليس.

صحيت م النوم حسيت إني متضايق، حزين، مهموم..  
يظهر كده إن النهاردة حيبقي يوم منحوس، مشئوم..  
شربت قهوة، وفتحت الجرنال.. صبحت متفائل..  
والحكاية كلها شوية أونطة، في باب حظك اليوم!

ياللي بتنضف وبيسموك زبال، أنا غلطانك، ومتأسف..  
دا أنت اللي شقيان طول عمرك، وأنا بس اللي بت أفف..  
لو اسمك بفعلك كانوا سمّوك نضاف، لكن دي ورطة..  
أصل ساعتها حيكون إيه اسمنا.. لو مش حنتفلسف!

ساعة انتظار تمرزي الدهر في الإحساس..  
وساعة لقلبك تمر في ثواني، وتنسى الناس..  
عجيب أمرها دي هي نفس الساعة..  
لكنها ف مرة بتتحس.. ومرة تانية بتتقاس!

خليك نمرة واحد، وما تقبلش تبقى نمرة اتنين..  
عيش حياتك متميز، وفي صفوف الناجحين..  
قالي.. دا أنا أستاذ، وأعجبك..  
دا وظيفتي في الشركة.. رئيس قسم الطبالين!

الدنيا زي السوق، بورصة، وللتجارة أصول..  
بضاعة صابحة، وع الفطرة، وبتمن معقول..  
طول ما فطرتها سليمة.. الأصول يغلى التمن..  
لكن يصيبها العفن تغلى! يبقى الضمير مقتول.

كتبت قصة حياتي بالأشخاص، والأماكن، والطرق..  
جايز في يوم أنسى كل شيء، وذكرياتى منى تتسرق..  
ولونسيت حبقى انتهيت.. وأدى حاجة تفكرنى..  
لكن رجعت وقلت.. ومنين راح تفتكر مكان الورق؟!

حسيت في يوم إني متكثف، ومتكسّر، ومتجبّس..  
محتاج أصرخ بصوت عالي.. مخنوق، ومحتاج أتنفس..  
رحت لطبيب، قالي.. دواك مش عندي..  
دواك في قعدة ع النيل، وحمص الشام، ولا ترمس.

أوقات بحب أتمرد عل كل عُرف أوقاعة..  
كانت مقبولة في عصرها، لكن متنفعش النهاردة..  
يقولولي خد بالك ده قانون.. أقول وماله!  
ما هو القانون ده اتوضع بعد ما اتناقش في قعدة.

ماشية تتعاقب وتتدلع.. تقول شوفتوا حد ف شقاوتي!  
أحمر خدود وشفافيف، ولا فيه ف جمالي وحلاوتي..  
وفجأة برق ورعد ومطر.. واتغسلت كل الوشوش..  
بصيت تاني ع الجمال.. لقيته الواد جمال ابن خالتي!

حكايات كثيرة في الحياة دي مفضوحة ومستورة..  
حكاية فرحانة.. وحكاية مجروحة ومجبورة..  
جمعت حكاياتي في ألبوم الصور..  
لقيت هو نفس شكلي.. بس حالي بألف صورة.

في أساطير الإغريق.. قاعد كيويبيد يرمي السهم..  
يرشق فـ قلب الصبية المتعايقة، والجدع الشهم..  
يتلاقوا العشاق يتحاكوا عن إله الحب..  
يفترقوا بعد الخصام، يقولوا دا كان أسطورة ووهم.

ساعات الأقي الأفكار والمعاني في دماغي متذبطة..  
أمسك القلم وأكتب، لكن يصيبني داء اللخبطة..  
أكتب كل فكرة في ورقة، وأحترما بينهم..  
وفي النهاية أرمي الورق.. وما عليه غير شخبطة.

حياتك دي أصلها كتاب، وفصوله مش زي بعضها..  
فصل حكمة، وفصل سخرية.. وفصل فزورة تحلها..  
ولما توصل لفصل الحزن.. إياك تبطل قِراية..  
دا صفحات الكتاب عمرها ما راح تتقلب من نفسها.

اتطحنت في الحياة، واستسلمت، ورفعت الراية..  
قلت إيه راح يكون بعد الوقوع غير بس النهاية!  
قابلت راجل عجوز.. ضحك وقال..  
وهو من غير الوقوع، كان يصبح الوقوف غاية؟!

خُفت كده ليه م الموت، وقلبك منه ارتعد؟  
دا الكل له يوم معلوم، مهما قرب، ولا ابتعد..  
خايف أقولك ع الحقيقة.. تخاف م الحياة..  
أصل الحياة جوانا.. فالروح مش فالجسد!

يا كل إنسان في الحياة دي عايش وموجود..  
إنسان أنا زيّك.. وأصلنا من نفس الجدود..  
ليه شفتني عدوك، وحرقت أرضي؟  
بكرة تحتاج طرحها، لو أرضك في يوم ما تجود.

قالوا في يوم ميلادك افرحوا يا أهل البلد..  
رقص أبوك، وقال راجل، ومن ضهري الولد..  
أديك كبرت.. وكمان صبحت عجوز..  
تفتكر كنت تستاهل، ولا كنت زيادة عدد؟!!

مالك كده منفوخ وفخور أوي بذاتك؟!  
ده صوتك مهما علي، بكرة حيطول سكاتك..  
بص كده على مكتبك.. فيه نتيجة ورق..  
تعرف أنهي ورقة مكتوب عليها تاريخ وفاتك؟

يا بسمة خجلانة، بتتداری بین الدموع..  
يا حبة قمح مزروعة في أرض الجوع..  
يا كل كلمة حق.. جاييلك أنا بُشرى..  
حمامة سلام.. هزمت دبابات ودروع.

قصايد وأشعار في الغزل والشعر الأسود المجدول..  
مقال صفحة أولى، ورواية من الخيال اللامعقول..  
فنان موهوب، ومبدع أنا.. بس ليه يا ترى..  
مصير كل ده يتلف بيهم سندوتش الفول؟!



**كاريما**  
للنشر والتوزيع